

Persicum Regnum.

Sive Sophorum Imperium.

Regio.

Situs.

Soli fertilitas.

Imperium majorem.

Persicum sive Sophorum Imperium, uti olim celebre, sic etiam hodie maxime clarum est. Ejus Incolæ Persæ. Vocantur & *Ayamii* vel *Azamii* ab Azamiæ regno, quæ quondam Assyria secundum nonnullos: *Persiani* a Perside. *Chefelbas* a pileo rubro quem impositum capiti gestant. *Sophiani* a *Sopho* principe. Situm autem est Persicum Regnum inter Turcicum Imperium, Tartaros Zagatheos, Cambaiæ Regnum, & inter Hyrcanum seu Caspium mare, ac Sinum Persicum. Habet igitur ab Ortum Indos, & Regnum Cambaiæ, a quo montibus ac desertis separatur: A Septentrione sunt Tartari, juxta *Abianum* sive *Oxum* fluvium: partem reliquam claudit mare Caspium. Ab occasu sunt Turcæ juxta *Tigridem* & Lacum *Giocho*: ad Austrum Sinu Persico adluitur, & mari Indico. Quod sane terræ spatium amplissimum est, complectitur enim plus minus gradus xxxiix ab Ortum ad Occasum. A Meridie vero ad Austrum xx occupat. De temperie Aeris Persidis regionis sic scribit Q. Curtius lib. v. *Regio non alia tota Asia salubrior habetur: temperatum Coelum, hinc perpetuum jugum opacum & umbrosum, quod æstus levat: illic mare adjunctum, quod modico tepore terras fovet.* Regionis autem hujus universæ non eadem passim est qualitas, non idem Solo genius. Qua Sinum Persicum spectat, ob Fluvios ipsam irrigantes: atque etiam versus mare Caspium, cum ob Fluviorum oportunitatem, tum ob Aeris clementiam, auramque frigidiorē: tota felix, tota beata: & hinc omne genus Frugum, Animaliumque non benigna solum Mater, sed & Nutrix sollicita. Abundat Tritico, Hordeo, Milio, ac similibus. Metallis quoque adfluit & lapillis. Vini item & Fructuum ubertas magna Paulo Veneto teste. Cetera fervoribus & siccitatibus exhausta deferuntur. *Persarum* porro gens obscura prius, initium nominis ac famæ accepit a Rege *Cyro*, qui ademptum *Medis* *Lydisque* Imperium, primus in *Persidem* intulit, ac amplissimum & florentissimum ex minimo & tenuissimo Asia subacta, & universo Oriente in potestatem redactio, reliquit. Successit Patri *Cambyſes*, qui *Ægyptum* imperio adjecit, a quo deinde ad *Darium* usque, qui ab Alexandro, Macedone victus vitam pariter cum Regno amisit, res Persicæ in suo statu manserunt. Regnatum est annos cxxx, quod Q. Curtius lib. quarto justissimo & ne minimum quidem fallente calculo tradidit: cui etiam adsentitur B. Hieronymus ad ix Caput Danielis. Hodie etiam Persicum Imperium quod penes *Sophos* est, inter potentissima totius Orientis Imperia numeratur: id quamquam oppressum aliquandiu modo a *Saracenis* fuit, modo a Tartaris, tamen rursus emicuit sub *Ismaele* Rege. Regionēs autem Imperio Persico subiectæ hæ sunt. *Media*, *Assyria*, *Susiana*, *Mesopotamia*, *Persis*, *Parthia*, *Hyrcania*, *Margiana*, *Bactriana*, *Parapamissus*, *Aria*, *Drangiana*, *Gedrosia* & *Carmania*. *Media* hodie *Servan* dicitur, inter Persiam & Mare Hyrcanum sita, ad Ortum Hyrcaniam habet & Parthiam, ad Occasum Armeniam majorem & Assyriam. Dividitur